

आकाशवाणी जयपुर-अजमेर
प्रादेशिक समाचार
दिनांक 02.03.2025 समय:18.45 बजे

- एशिया अर प्रशांत खेतर रा श्री आर अर सर्कुलर इकोनॉमी फोरम काले सूं जयपुर मांय-केन्द्रीय आवास अर शहरी विकास मंत्री मनोहर लाल खट्टर उद्घाटन करेला।
- मुख्यमंत्री भजनलाल शर्मा कयो-विरासत संरक्षण रे साथे ही विकास ने नुवा आयाम देणा व्हेला।
- प्रधानमंत्री
- आईसीसी चैंपियंस पुरुष क्रिकेट ट्रॉफी मांय आज भारत पहले बल्लेबाजी करता थकां न्यूजीलैंड ने जीत खातिर ढाई सौ रनां रो लगस दियो।

000

जयपुर मांय काले सूं 5 मार्च ताई होवण वाळां एशिया अर प्रशांत खेतर रा श्री आर यानि रिड्यूस्, रियूज अर रिसाइकल अर सर्कुलर इकोनॉमी फोरम खातिर सगळी तैयारियां पूरी कर ली गई है। इण मांय 30 सूं बल्ली देशां रा प्रतिनिधि हिस्सो लेवेला। इण मांय न्यारा-न्यारा सत्रां अर चर्चावां रे मार्फत एकीकृत अपशिष्ट प्रबंधन माथे फोकस करयो जावेला। सर्कुलर इकोनॉमी मांय प्राकृतिक संसाधनां रे दोहन ने कम करयो जावे है। फोरम रो खास हिस्सो जयपुर डिवलेरेशन व्हेला। इण ने अपनायो जावेला। एक रपट -

.....

मुख्यमंत्री भजनलाल शर्मा आज डूंगरपुर, बांसवाड़ा अर पाली दौरा माथे रिया। वणा डूंगरपुर जिला रा खेरमाल गांव मांय राखीज्या श्री जाम्बुखण्ड भैरव मंदिर मांय जीर्णोद्धार जळसा मांय शिरकत करी। इण मौक माथे जनसभा ने संबोधित करता थकां वणा कह्यो के मंदिर सनातन संस्कृति री आत्मा है। श्री शर्मा कह्यो की आपा ने विरासत संरक्षण रे साथे ही विकास रा नुवां आयाम देवणा व्हेला।

.....

मुख्यमंत्री भैरव मंदिर मांय कर्या जा रिया जीर्णोद्धार री सराहवना करी। कार्यक्रम मांय जनजातीय विकास मंत्री बाबूलाल खराड़ी भी मौजूद रिया। इण रे पाछे मुख्यमंत्री बांसवाड़ा रा त्रिपुरा सुंदरी मंदिर पहुंच्या। वणा पूजा अर्चना कर र प्रदेश मांय खुशहाली री कामना करी। अब सूं कुछ ही देर पैल्या मुख्यमंत्री पाली रा देसूरी पहुंच्या। वणा मांगलिया गुढा मांय ग्रामीणां सूं बातचीत करी। मुख्यमंत्री एक धार्मिक जळसा मांय भेळा हो रिया है।

000

लोकसभा अध्यक्ष ओम बिरला आप रे संसदीय खेतर कोटा-बूंदी दौरे माथे है। श्री बिरला कई कार्याक्रमां मांय हिस्सो ले रिया है। आज वणा कोटा मांय शिक्षा महकमां रे कर्मचारियां री सहकारी सभा रे कार्यक्रम मांय शिरकत करी। इण मौके माथे श्री बिरला कह्यो के आज रे बगत तकनीकी संसाधन बढ़्या है, पण शिक्षा रे खेतर मांय क्रांति शिक्षक ही ला सके है। नुवी पीढ़ी ने तैयार करणे मांय शिक्षक री महत्ती भूमिका होवे है। वणा कह्यो के केवल भौतिक संसाधनां सूं नागरिकां रो चरित्र निर्माण नही कर्यो जा सके है।

.....

लोकसभा अध्यक्ष कह्यो के सहकारिता आंदोलन दुनियाभर मांय बदलाव लाणे रो काम कर्यो है। इण रे माध्यम सूं लोगों रे जीवन मांय घणो बदलाव आयो है अर सूदखोरी सूं लोगों ने निजात मिली है।

000

प्रदेश मांय घुमंतू जाति रा युवावां ने मुख्य धारा सूं जोडने अर वां ने आत्मनिर्भर बणावण खातिर खास जतन करया जा रहया है। इणी कड़ी मांय आज जयपुर मांय घुमंतू जाति उत्थान न्यास री कानी सूं विशेष रोजगार मेळो लगायो गयो। इण रे चालता युवावां ने आप रो काम सरू करणे खातिर ई रिक्शा, सिलाई मशीन अर दूजा संसाधन मुहैया कराया गया। उद्योग मंत्री कर्नल राज्यवर्द्धन सिंह राठौड़ इण मौके माथे मौजूद रहया। वणा कह्यो कि मेळे रो आयोजन घुमंतू जाति रा युवावां ने स्वावलंबी बणाणे री चोखी पहल है।

0000

प्रधानमंत्री नरेन्द्र मोदी गुजरात रा जामनगर जिला मांय पशु बचाव केंद्र वनतारा रे दौरे माथे है। वनतारा लगे-टगे तीन हजार एकड़ खेतर मांय फैल्योडो पशु बचाव, संरक्षण अर पुनर्वास केंद्र है। श्री मोदी राज्य रा तीन दिन रा दौरे माथे काले जामनगर पहुंच्या। प्रधानमंत्री आज सोमनाथ मिन्दर मांय पूजा-अर्चना करेला। वे गिर नेशनल पार्क रा मुख्यालय सासन जावेला अर श्री सोमनाथ न्यास री बैठक री अध्यक्षता भी करेला। ओ न्यास विश्व प्रसिद्ध सोमनाथ मिन्दर रो प्रबंधन संभाळे है। प्रधानमंत्री काले एशियाई शेरों रे निवास स्थल गिर नेशनल पार्क मांय सफारी माथे निकलेला। वे वन्य जीवन सूं जुड्या राष्ट्रीय स्तर रे मुद्दां माथे चर्चा खातर सासन मांय राष्ट्रीय वन्यजीव बोर्ड री सातवीं बैठक री अध्यक्षता करेला। ओ बोर्ड वन्यजीवन अर वनां रे संरक्षण तथा विकास खातर काम करे है। प्रधानमंत्री इण बोर्ड रा अध्यक्ष है।

000

केन्द्रीय उपभोक्ता मामला, खाद्य अर सार्वजनिक वितरण मंत्री प्रहलाद जोशी ने देश मांय आपूर्ति श्रृंखलावां मजबूत बणावण अर खाद्य सुरक्षा पुख्ता करणे मांय केन्द्रीय भंडारण निगम-सीडब्ल्यूसी री भूमिका ने खास बतायो है। निगम रा 69 वां थापना दिवस मौक माथे नुवी दिल्ली मांय आप रे वीडियो संदेश मांय श्री जोशी कह्यो के वित्तीय बरस 2023-24 रे चालता निगम ने 21 लाख वर्ग फुट सूं बत्ती री अतिरिक्त भंडारण खमता विकसित करन सराहनीय काम कर्यो है। वणा कह्यो के निगम री दाळा, कपास अर मूंगफली रे भंडारण, परिचालन अर दुलाई रे माध्यम सूं प्रधानमंत्री गरीब कल्याण योजना अर प्रधानमंत्री अन्नदाता आय संरक्षण अभियान रे सफलता सू चालण मांय बडो योगदान है।

000

देश मांय लारले दशक मांय गरीबी मांय कमी आई है। एक नुवां अध्ययन रे मुजब आ जाणकारी मिली है। अर्थशास्त्री सुरजीत एस. भल्ला अर करण भसीन रा आलेख मांय बरस 2022-23 अर बरस 2023-24 रा हाल ही मांय जारी घरेलू खर्च रा आंकड़ां रो विश्लेषण कर्यो ग्यो। सर्वेक्षण आंकड़ां सूं पातो चाले है की गरीबी रे स्तर मांय कमी आई है। अध्ययन मांय दावो कर्यो ग्यो है के देश मांय अबे बौळी गरीबी लगे-टके खत्म हो चुकी है।

000

मुंबई री एक विशेष भ्रष्टाचार निरोधक अदालत सेबी री पैली आळी अध्यक्ष माधबी पुरी बुच समेत बोर्ड वरिष्ठ अहलकारां रे खिलाफ एफआईआर दर्ज करण रा हुकम दिया है। कथित शेयर बाजार धोखाधडी अर नियामक कानूनां रा उल्लंघन रे मामला मांय ओ हुकम दियो गयो है। एक पत्रकार री कानी सूं दायर याचिका पाछे ओ हुकम जारी कर्यो गयो। आदेश मांय कह्यो गयो है कि मामला री जांच री अदालत निगरानी करेली अर न्यायालय ने तीस दिनां रे मांय-मांय रपट पेश करणे रा हुकम दिया है।

000

बीकानेर रे नाल खेतर मांय एक सड़क हादसा मांय चार मोट्यारा री मौत व्हेग्यी। घटना देर रात राष्ट्रीय राजमार्ग-11 माथे कार अर दो मोटरसाइकिलां री टक्कर सूं व्ही। इण रे चालता तीन मोट्यारां री मौके माथे ही मौत व्हेग्यी अर एक दूजो जणो सफाखाना मांय ईलाज रे चालता दम तोड़ दियो। दुर्घटना रे पाछे कार चालक मौका सूं फरार व्हे ग्यो। वटी ने बाड़मेर जिला मांय नेशनल हाईवे-68 माथे कार अर ट्रक री टक्कर मांय दो जणा री मौके माथे ही मौत व्हेग्यी अर एक युवती गंभीर रूप सूं घायल व्हे ग्यी।

000

नशा छोड़ो—जीवन जोड़ो साइकिल यात्रा आज पाली पहुंची। इण रो न्यारी—न्यारी ठौड़ां माथे स्वागत कर्‍यो ग्यो। एन.एस.यू.आई. री कानी सू आ यात्रा निकाळी जा री है। इण रे माध्यम सू युवावां ने नशे सू दूर रहणे खातिर प्रेरित कर्‍यो जा रह्यो है। पैली आळा उपमुख्यमंत्री सचिन पायलट काल सोजत मांय साइकिल यात्रा मांय भेळा हो र लोगां सू नशो छोड़ने रो हेलो करेला।

000

श्रीगंगानगर मांय आज सू पशु मेळा री सरूआत व्ही। ओ मेळो तीन दिन चालेला। इण मांय पडोसी राज्य पंजाब अर हरियाणा सू भी घणी तादाद मांय पशुपालक भेळा हो रिया है। म्हाणा संवाददाता बतायो कि मेळा मांय कृषि उपकरण भी प्रदर्शित कर्‍या गया है।

.....

प्रदेश रे मौसम मांय आवता दो दिनां ताई तापमान मांय खास बदलाव होणे रा आसार नही हैं। चार मार्च सू उत्तरी हवावां रे असर सू कमती अर बत्ती तापमान मांय 2 सू 4 डिग्री गिरावट री आस है। इण बीचे पश्चिमी विक्षोभ रो असर काले भी बणयोड़ो रह सके है। इण रे प्रभाव सू श्रीगंगानगर, हनुमानगढ़ अर आसे—पासे रे खेतरां मांय गरज रे साथे हल्की बिरखा हो सके है। वठिने राज्य रे बाकी हळका मांय मौसम सूखो रेवेला। इण बीचे आज केई ठोडां माथे बादळ छायोडा रिया। वठी ने कुछेक जगहां तेज धूप रे साथे हल्की गर्मी रो एहसास व्हीयो।

000

आईसीसी चैंपियंस पुरुष क्रिकेट ट्रॉफी मांय आज भारत रो मुकाबलो न्यूजीलैंड सू हो रियो है। दुबई स्टेडियम मांय दोपहरां ढाई बज्यां सू खेल्या जा रिया इण मुकाबला मांय न्यूजीलैंड टॉस जीतर पैल्यां गेंदबाजी रो फैसलो कर्‍यो। पैल्यां बल्लेबाजी करने उतरी भारतीय टीम न्यूजीलैंड ने जीत खातर 250 रनां रो लगस दियो है। भारतीय टीम 50 ओवरां मांय नौ विकेट रे नुकसान माथे 249 रन बणाया। भारतरी सरूआत चोखी नी रही। पैल्या छह ओवर मांय ही दोन्यू सलामी बल्लेबाज शुभमन गिल अर रोहित शर्मा पेवेलियन पहुंच गए। विराट कोहली भी 11 रन ही बणा सक्‍या। श्रेयस अयर 79 रन जोड़्या। न्यूजीलैंड रा मैट हेनरी पांच विकेट लिया।

000